

## Es iss e Katastrof

Heit hott die Paula oogerufe unn hott mette Fraa geschwätzt. Ei gude, hottse gesacht, merr sieht sich joo gar nit mehr, kooner hott Lust ferrs Haus ze verlosse unn de onnern ze besuche. Ei unn dessdeweeche wollt ich nor emol wisse, was ihr bei dere Hitz so macht.

Was solle merr mache, hott die Fraa zur Antwort gewwe, daachsiwwer bleiwe mir wie ihr aach im Haus, heechsdens dassmer mol oikaafe geht odder uff de Friedhof fährt zum Gieße, unn owends machsde e bisje Wasser uff die Blumme im Gadde unn uff de Terrass. Vill mehr machsde halt nit, wennde nit grad uffte Feier musst.

Sacht die Paula: Mir Rentner kennes uns joo oideile, awwer unser junge Leit, die schafte misse, dene mächt dess Wetter gonz schee ze schaffen. Wenn merr droo denkt, dass unser Männer noch draußerum fahrn missde, bei dene Temperadurn im Audo unn ohne Klimaanlaach in de alde Audos, doo iss merr froh, dass die heitzedaach dehoombleiwe kenne. Awwer bei uns gehts joo noch, in de Türkei solles iwwer ferrzich Grad soi.

Die Fraa sächt: No ja, im Urlaub kann merr halt de gonzte Daach im Wasser puddele, dess werrn die Leit in de Türkei aach mache. Bei uns hier kennte merr ab unn zu mol e bisje Abkühlung gebrauchte, awwer wenn was kimmt dann isses e Gewitter unn dann isses so stark dass die Bauern Ängst hawwe misse, dass die Frucht verhaachelt werdd.

Genau, sacht die Paula, unn so e Gewitter kimmt immer zu de falsch Zeit. Doo warn merr om vergangene Somsdaach uffem Geburtsdaach oigelade, die Leit hadde alles schee in ihrem Gadde mett Zelde unn so uffgebaut, unn dann fängts um korz nooch fünf oo ze reechene unn heert erst korz vor neun widder uff. Es iss e Katastrof.

Weil de grad Katastrof gesacht host, moont die Fraa, die Honnes schwätzt monchmol defoo, dass dess alles mett de Klimakatastrof zesommehängt. Mir moone joo immer, mir hädde als Kinner nix als heiße Summer gehabt, awwer jetzt hotter gelese, dass dissjohr de Juli de heißeste Juli werdd seit ach was waaß ich wievill Johr.

Die Paula hott dem zugestimmt. Moiner sächt aach als, dasses e Katastrof wär bei dere Hitz, unn geht desweeche schunn gar nimmi oikaafe, alles muss ich mache.

No, moont die Fraa, doo soller doch moins frieh gehe, doo isses doch noch nit ze warm, odder?

Ja, ja, gibt die Paula zur Antwort, dess habb ich emm aach gesacht. Unn waaßde waser gesacht hott? Dess iss egal wonnde oikaafe gehst, es iss e Katastrof.

Die Fraa hotts nit gonz verstonne und frächt die Paula: Wie moonder dess dann, doin Karl?

Sacht die Paula: De Karl sächt, in unserem Alder wärn merr joo all e bisje runder als frieher. Awwer wennde siehst wie monch älter Fraa in korze enge Hose erumlaafe dut, dess isse Katastrof, sächt moin Karl.

Eiern Honnes